

Himno y Bandera Aruba

Himno y Bandera

E dia nacional mas importante di Aruba ta dia di Himno y Bandera.

18 maart ta e dia cu a scoge pa celebra himno y bandera di Aruba, pasobra durante Mesa Rondo na Hulanda riba e fecha ey na aña 1948 pa prome biaha a entrega un mocion, cu ta boga pa auto determinacion di e pueblo Arubano.

Gilberto "Betico" Croes como politico a dedica su mes mas tanto pa e derecho di auto determinacion di e pueblo Arubano. Despues cu Hulanda a nenga pa negocia na januari 1976 tocante un luga apart di Aruba denter di Reino Hulandes, Betico Croes a indica cu lo declara independencia na maart 1981. Pa fortalece e consciencia nacionalista, riba su proposicion e bandera di Aruba y himno di Aruba propio a keda instala como simbolonan di identidad den Stadion na Dakota riba 18 maart 1976.

Mientras cu ta hisa e bandera Arubano pa prome biaha den Stadion, e coro di Maybeline Arends Croes riba acompañamento di orkesta di Aruba bou di guia di e musico conoci Joy Kock, a canta e composicion, un wals di Padu Lampe y difunto Rufo Wever "Aruba Dushi Tera" como e himno Arubano. Pueblo Arubano tabata masalmente presente pa duna e Bandera y Himno su honor.

E escudo di Aruba

E escudo di Aruba ta e escudo oficial di Aruba. E escudo a keda estableci na aña 1955 y ta legalmente reconoci como un di e simbolonan nacional Arubano.

E escudo ta consisti di siete elementonan principal

1. Riba e escudo ta sinta e leon cora cu ta simbolisa forza y generosidad. E leon ta simbolisa alabes e laso cu Reino Hulandes.
2. E ramanan di laurel parti abou di e escudo ta e simbolo di paz y amistad.
3. Un cruz blanco mey-mey di e escudo ta dividi esaki den cuater compartimento. E cruz, desde siglo diesun e simbolo di cristianismo, ta representa devocion y fe.
4. E prome compartimento robes ariba ta mustra e mata di aloë (aloë vera) contra un fondo blauw. E mata di aloë ta simbolisa e industria di aloë, e prome fuente di ingreso di Aruba.

5. E di dos compartimento drechi ariba ta ilustra e sero di Hooiberg. Esaki ta simbolisa e isla cu ta halsa for di lama. E color berde ta e color di e alegria cu ta wordo sinti desde Aruba su auto determinacion y e liñanan manera ola ta simbolisa e lama.
6. E di tres compartimento robes abou ta muestra dunamento di man na color cora contra un fondo color oro. E dunamento di man aki ta simbolisa e lasonan di amistad entre e pueblo Arubano y otro nacion, riba tereno politico, economico y cultural. E color cora ta nifica nos caracter generoso, nos simples y balor di trabou pa reforsa e lasonan aki.
7. E di cuater compartimento drechi abou ta muestra un wiel contra un fondo color cora. E wiel ta simbolisa un timon cu ta duna guia na nos industria, cu ta e fuente di bida mas importante di e isla.

Celebracion

E celebracionnan mes ta consisti entre otro di un ceremonia na Plaza 18 di maart, cu a keda inaugura na 1996, pa conmemora e fecha na 1948 ora na Hulanda durante e Conferencia di Mesa Rondo a entrega pa prome biaha un peticion pa e pueblo Arubano haya e derecho di auto determinacion. Durante e dia mes ta tene diferente actividad y manifestacion cultural den tur barrio di e isla y museo y monumentonan ta habri porta gratuitamente pa publico. En conexion cu e dia nacional ta organisa festivalnan di canto cu participante den diferente categoria di edad.

Arubanonan den exterior tambe ta celebra e dia nacional, entre otro na Kòrsou y Hulanda. E celebracion na Hulanda ta usualmente riba un otro fecha y ta conoci como Arubadag.

Pregunta:

1. E bandera di Aruba a keda introduci oficialmente riba:

- A. 18 di maart 1986
- B. 18 di maart 1976
- C. 18 di maart 1955

2. Cua ta e 4 colornan den e bandera di Aruba?

3. Na ki aña a introduce e himno nacional di Aruba?

- A. 18 di maart 1955
- B. 18 di maart 1986
- C. 18 di maart 1976

4. Yena e contesta corecto. Scohe entre: *blauw – cora – blanco - geel*

- a. E color _____ ta simbolisa e industria actual y turismo como fuente di entrada mas importante, mescos cu oro y industria di aloe.
- b. E color _____ ta nifica e lama inmenso cu ta rondina Aruba.
- c. E color _____ ta simbolisa e playanan y e puresa di e pueblo Arubano.
- d. E strea color _____ ta representa e 4 puntonan di un compas.

5. Cua di e frasenan aki NO ta corecto.

E bandera di Aruba a keda introduce ariba 18 di maart 1976.

Aruba su bandera tin 5 color.

Aruba su escudo a keda establecu na aña 1948.

Aruba a haya su Status Aparte riba 1 di januari 1986.

E himno di Aruba a wordo composita door di Hubert Booi.

6. Cua aña ta pas cu e frase?

E escudo di Aruba a keda introduci. 1954

E coro di Trupialen a graba e himno di Aruba. 1976

Hubert Booi a skirbi un couplet adicional di e himno. 1996

E ceremonia na Plaza a keda inaugura. 1955

7. Como ki simbolo e escudo di Aruba a keda reconoci?

8. Cuanto elemento e escudo di Aruba tin?

9. Kico e mata di aloe den e escudo di Aruba ta simbolisa?

10. Kico e ramanan di Laurel parti abou di e escudo ta simbolisa?

11. Kico e dunamento di man den e escudo di Aruba ta simbolisa?

12. Ken a dedica su mes mas tanto pa e derecho di auto determinacion di e pueblo Arubano?

13. Na ki aña Betico Croes a indica cu lo declara independencia?

14. Ken a composita e himno di Aruba?

15. Na ki aña e celebracion a keda inaugura?

16. Ki actividadnan ta tuma lugar durante e dia mes?

17. Cua paisnan tambe ta celebra e dia nacional aki?

18. Ariba ki dia nan ta celebra e dia nacional na Hulanda?
